

# Powšitkowne WOZJEWJENJA

njedźelu, 6. měrca 2016

## Nóc wujednanja w Róžeńće

Wšitcy wěriwi, hač mužojo abo žony, młodzi abo stari, su pjatk do bołmončki, 18. měrca, do Róžeńčanskeje swjatnicy na nóc wujednanja přeprošeni. Serbscy młodostni ju wuhotuja. Nóc wujednanja započnje so w 19.30 hodź. – wječorne kemše na tym dnju we wosadach njebudu – a skónči so z Božej mšu w 23.00 hodź. W běhu wječora změja wěriwi skladnosć, so modlić, na hudźbu sluchać abo ćicho wo sebi rozpominać a na Boha sluchać. Wot 21 hodź. wobsteji tež móžnosć, pola wjacorych serbskich duchownych k sakramentej wujednanja, swjatej spowědži, přistupić abo jednorje wo duchownu rozmołwu prosyć. Kóždemu samomu je přewostajene, kak sej wječor časowje zarjaduje. To rěka, zo je móžno, přez cyły čas přitomny być abo po swojim dobrozdaću přińć abo woteńć.

## Musica sacra w Bačońskej cyrkwi

Hudźba k póstnemu časej zaklinči „Z lubosće mój Zbóžnik zemrje“ njedźelu, 13. měrca, w 14 hodź. w Bačońskej cyrkwi. Nyšpor w rjedže Musica sacra wuhotuja spěwni solisća a orchester Serbskeho ludoweho ansambla pod nawodom kapalnego mištra Gabriela Donà. Nimo twórbow Johanna Sebastiana Bacha a Josepha Haydna zanjesu twórby serbskich komponistow Jana Bulanka, Jana Pawoła Nagela a Detlefa Kobjele. Wšitcy su wutrobnje přeprošeni.

## Zetkanje Serbow w sakskej stolicy

Serbja w Drježdžanach, jich přiwuzni a přećeljo su wutrobnje přeprošeni na Božu mšu w serbskej rěči z fararjom Gabrišom Nawku. Tutu budžemy njedźelu, 6. měrca, w 16 hodź. w cyrkwi swjateho Antonija, w Drježdžanach-Löbtauweje, Bünauska 10, swječić. Po kemšach zetkamy so k serbskej bjesadze we wosadneje rumnosći. *M. Bubnerjec*

## Bratrowstwo hraje w Chróscicach a Radworju

Přichodne předstajenje dźiwadłoweje hry „Hdyž kokula woła“ budže tutu njedźelu, 6. měrca, w 17.00 hodź. na Krawčikec žurli w Chróscicach. Tydžeń pozdžišo, njedźelu, 13. měrca, zahraja Bratrowčenjo w 17 hodź. na žurli Radworskeho hosćenca „Meja“. Dźiwadłowa skupina Bratrowstwa wšitkich wutrobnje přeprošuje.

## Duchowny koncert młodeho serbskeho komponista z hudźbnej nowostku

Prapremjera twórby „Stabat mater“ młodeho serbskeho komponista a cyrkwinskeho hudźbnika Feliksa Brojera zaklinči sobotu, 12. měrca, we 18 hodź. w klóšterskej cyrkwi w Pančicach-Kukowje. Drje přeni króc w hudźbných stawiznach bu šěroko znaty tekst za basowe solo a smyčkarjow skomponowany. Twórba zanjesa ansambl Chordophone z Budyšina a młody spěwar a student cyrkwinskeje hudźby Tom Kessler z Hamburga. Zastup je darmotny. Prosy so wo kolektu. Dalše předstajenje budže wulki pjatk, 25. měrca, w 19.30 hodź. w Smochčanskim Domje biskopa Bena.

## **Putniska jězba do Swjateho kraja**

Wot póndžele do póndžele, 4. do 11. apryla 2016, organizuju putnisku jězbu z lětađłom do Swjateho kraja. We wobłuku kołojězby z busom smy tam mjez druhim w Galileji po puću a wopytamy města Jerusalem, Betlehem a Jericho. Přizjewić měli so zajimcy hač do wutory, 15. měrca. Nadrobniše informacije dóstanu pod telefonowymaj čisłomaj (01 63) 7 33 82 05 abo (03 57 96) 9 54 28 (hakle po 19 hodž.) abo pola mje w Hórkach, Sydlišćowu puć 2.

*Maćij Hadank*

## **Komplet a tójšto wjace**

Přeprašujemoj wšitkich młodostnych wutrobnje na zarjadowanja dekanatneje młodžiny w póstnym času, kotrež maja dušinemu natankowanju a rozmyslowanju služić:

sobotu, 12. měrca, w 20 hodž. – komplet w Njebjelčicach

pjatk, 18. měrca, w 20 hodž. – nóc wujednanja w Róžeńće

njedźelu, 20. měrca, w 14 hodž. – křižowy puć w Pančicach-Kukowje

Po kompleće je přidatnje něšto spřihotowane. Dajće so překwapić! Póstny čas njech služi tež jako přihot na Swětowe zetkanje młodžiny.

*Leńka a Lucija, młodžinskej referentce*

## **Putniska jězba do Španiskeje a Portugalskeje**

Wšitcy zajimcy su wutrobnje na putnisku jězbu z busom do Španiskeje a Portugalskeje přeprašeni, kotraž budže wot soboty do njedžele, 9. do 17. julija. Wopytaja Barcelonu z katedralu Sagrada Familia, španisku stolicu Madrid, Avilu a Albu – městnje skutkowanja swjateje Terezy z Avile – a znatej putniskej městnje Fatimu a Santiago de Compostela. Přizjewjenja su móžne pola Šmitec w Radworju, telefonowe čisło (03 59 35) 28 60 abo z mailku na adresu: [email@schmidt-reisen-radibor.de](mailto:email@schmidt-reisen-radibor.de).